

DISPUTATIO X.

DE PECCATO.

THESIS I.

Discrimen est inter doctrinam de peccato, quam Spiritus sanctus in verbo Dei patefecit, & inter notitias naturales, seu disputationes Philosophicas de vitiis in omnibus causis, efficiente, materiali, formali, & finali.

2. Peccatum dicitur vitium, malitia, error, delictum, flagitium, facinus, scelus, crimen, culpa. Græcè in scripturis Apostolicis dicitur ἁμαρτία, ἁμάρτημα, παράπτωμα, ἀνομία, παρακοή, ἀπειθεῖα, παράβασις, ἀδικία, ἀσέβεια, ἀποστασία. Hebræi octo præcipuè vocabula habent, quibus peccatum vel delictum significatur: quæ vide apud Dominum Chemnitium.

3. Peccatum est ἀνομία. 1. Iob. 3. v. 4. vel: Peccatum est à divina lege aberratio, graviter offendens Deum, & ad severam vindictam provocans.

4. Peccatum in hominibus aliud est originale, aliud actuale.

5. Originis sive originale peccatum dicitur in Veteri Testamento malum figmentum humani cordis ab adolescentia, Gen. 8. v. 21. Peccatum in quo homo concipitur, Psalm. 51. v. 7. Peccatum juventutis, Psal. 25. v. 7. Peccatum occultum,